


富春三日遊記

褚宗元  
署端

地824  
9267



三五七八

芬陀利館瓚藁

紹興周大封辨西甫



富春三日遊記

夫居城市少山水之趣。坐塵氛忘歲月之馳。六逸七賢。探幽攬勝。結契雲霞。其志蓋有屬焉。民國十有七年十月八日。爲夏曆戊辰八月二十五日。余友郁餐霞君葆青偕孫君漱石玉聲胡君寄凡祥翰嚴君載如昌培先期由滬聯翩抵杭。約爲富春之遊。余戒旦登車。經萬松嶺。朝露未泫。林翠欲滴。臨睨湖上。水氣蒸騰。堆毳擘絮。隨風蕩漾。遠近無際。南北諸峯。却在白綿被中。努出頭來。髮影參差。睡態未醒。車行迤邐。至江干。旭日初上。靈景四流。墟落染紅。林壑散絳。海門龜赭。二山出沒波濤間。縹緲煙雲。眴轉錦采。幻化樓閣。望若金銀。一水槎浮。蓬萊可卽矣。有頃。孫郁胡嚴四君亦驅車至。相與購票登

芬陀利館瓚藁

遊記

一

錢江輪船。時表九句鐘啓旋。牡籥扇離。牝管噴巽。轉棹炎熾。破浪風馳。愚公移山。瞬改面目。長房縮地。旋易東西。剎那回矚。已失九曜大慈嶺翠矣。船西南行三十五里。至東江嘴。爲浦陽江水入浙江合流處。其南爲漁浦。旁達諸暨。謝靈運詩。宵濟漁浦潭。合流深處。故以潭名。過東江嘴。江流更曲。山密更幽。維時高楓矮栢。初放嫣紅。蒼翠錯雜。疎而益妍。簪花嵐影。兩岸迎人。流錦波光。終朝送客。又十五里至漁山。已入富陽轄境。浙江流域。至此始以富春名矣。相期遠游。初入勝境。山川秀發。風日清麗。如展小李將軍金碧巨幅。雜以疎樹荒村。雲林遠景。然其斧劈麻皴。面目古拙。卻如巢由洗耳。離世獨立。亦有紆徐卓犖。宛似嵇阮風神。翛然塵壒之外。又五里至里山。山南亦佳灣靈峯精舍。爲夏震武先生講學處。安定學齋。入俗不變。延平道籥。與古爲新。洵稟鍾毓之靈奇。益結華嵩之景仰已。

船由里山。行十里至靈橋。十五里至富陽。二十里至湯家埠。二十里至場口。十里至東梓關。輪行甚速。但見雲逐山飛。煙隨岸走。峯巒萬疊。撲几皆青。齊樹百重。過窗如畫。樓臺接浪。涵於空明。村隴承曦。望之瞭曖。遠近風颿。與波光相上下。意象不窮。莫能景狀。

未至東梓關。遠望一峯秀出。夭矯凌雲。亭亭如華蓋狀。榜人引手指之。云卽白鶴峯也。一名烏石山。俗呼天子岡。咸淳志。高五千丈。廣二十里。面大江。孫鍾墓在焉。嚴州志。漢末孫鍾種瓜於此。有三異人。葬其祖墓。葬畢。化爲三白鶴飛去。故名白鶴峯。一統志。孫鍾遇二少年。曰。予司命也。以君孝感。故來。遂指山曰。此堪爲墓。鍾志之。母卒葬焉。三志所紀。一爲孫鍾墓。一爲孫鍾母墓。一爲孫鍾祖墓。未知孰是。烏石山。今屬桐廬縣。東面山麓。屬富陽縣。古之桐廬。隸富春郡。故志成以天子岡爲富春之山。距富陽五十里。距桐廬四十五

里。雲壑悲涼。霸圖消歇。薜蘿互影。猶認公琴。松柏交光。都爲宰樹。蒼茫弔古。感慨係之。

過東梓關爲桐洲。洲別爲二。隸富陽者曰小桐洲。半隸富陽。半隸桐廬者曰大桐洲。二洲相隔江水一里許。袤二十里。大桐洲南臨大江。北有後港。相傳桐君種藥於此。中有看潮村。石瀨屹立江邊。世傳子陵垂釣處。宋胡寅有記。咸淳臨安志。言之頗詳。小桐洲出橋。爲江東之最。汽輪過此。午景方酣。秋煙自媚。村綠在樹。沙白接天。鷗鷺衝波。蓬蓊送日。混茫無極。次第變滅。遠山深處。白氣如沍。茅舍二三。深隱蘿石。自非羊裘冷客。不能耐此清寒也。

自東梓關逆流而上。入桐廬境。浙江流域。始以桐名。沙石犖确。水淺舟膠。榜人用竿測水。方鼓輪行。行十五里至窄溪。爲甘溪之下流。分派東入於江。又三十里至桐廬。時表已報四句鐘矣。輪船泊處。危樓高聳。俯瞰大江。是爲惠

賓旅館。同人攜篋登樓。憑欄遠眺。江泛清光。鳴溜若筑。山含笑影。折疊爲屏。林風乍生。似流淨梵。人烟遠起。亦引遐思。啜茗小憩。爰共論浙水交通。並商略桐君之游。

水經注。浙江出三天子都。浙江者。浙江也。浙江自歙縣東北流。迤邐逕桐廬縣。東爲桐溪。又東北逕新城縣。又東北入富陽縣。天香閣隨筆云。浙江之源有三。一自新安。一自三衢。一自婺州。三水總匯於睦州。然後過桐廬。經富陽。下臨安。而歸於海。在桐廬曰桐江。在富陽曰富春江。江旁兩岸皆山。一水中貫。其在桐廬以上。不過或折而北。或折而東。至富陽臨安之間。則又若折而東。復折而西。形如之字。潮汐奪流而上。近至富陽而回。遠至桐廬而止。商局輪船。駛至桐廬。灘淺湍急。不能復上。旅客經此。便易民舟。繹挽而進。近人組織滑艇公司。直達三衢。機械窳敗。虧蝕中止。他時政治教育實業。建設完備。

而後交行政。因時發展。黟歙婺睦茶漆木石。百貨運輸。往來便利。不徒逸客停筇。騷人佇楫。亞歐游旅。紛集搜奇。是江流域山水之勝。將矜耀於五洲也。

桐溪一名紫溪。在桐江之東。其源出自天目。又經於潛分水二縣。東流六十里。出桐君山下。入於桐江。余偕同人出惠賓旅館。循桐江北岸行。不五十武。呼舟渡桐溪。其水深渟若黛。對岸單椒峭拔。爲桐君山。登麓爲山門。中供玄壇。入門石磴一線。盤陁陡上。桐枝煙暖。藥草風香。竹樹繚紆。深翠若翳。秋花異色。滿綴高下。夕景豔開。迴絕人寰。桐君廟高踞山巔。下臨兩江。殿宇爽塏。左供張睢陽像。右供釋迦佛像。上有古塔。相傳山側。舊有桐樹。枝柯陰蔽數畝。桐君不知何許人。亦莫詳其姓氏。常採藥於此。結廬桐下。或問其姓。則指桐示。因號爲桐君山。或曰黃帝時。嘗與巫咸同處方餌。未知是否。著有藥錄。

一卷久失其傳。

下桐君山。仍渡桐溪。山霏溪淥。陰映如畫。晚色上竹。涼吹吟秋。便道遊桐廬。市中屢肆鱗櫛。百貨岔湧。然絕少奢靡物品。交易於巖光林影中。頗覺淳樸不俗。聞醉鮒魚爲桐廬特產。因非其時。不敢購嘗。旋回旅館晚餐。侍者因述縣西二里許。有圓通寺。唐會昌中建。名聖德寺。宋大中祥符七年。賜改今額。寺有古觀音像。有泉名曰稱心。味絕甘冽。暝色已深。不及往叩禪扉。與退院老僧參雪竇偈。吃趙州茶。遙聽噌吰鐘動。卻已聲聲入耳鼓也。

九日侵晨。已由旅館代雇大六艚船。移泊樓下。開窗遐矚。旭日欲升。雲嵐密掩。重霧不曉。淺江欲潮。沉瀝波間。走如練帶。煙霏林外。圍若絺蒙。峯黏天而失青。岸垂柳而綴白。早食後。時表七句鐘。登船解纜。行十里至河灣埠。又十里至清渚源。源出建德雲岫山。其上流名杜息溪。東南繞嚴陵山北。東流入

芬陀利館瓶藁

遊記

四

江。是日風逆天寒。舟行緩滯。中途增雇權人二名。雙槳齊鼓。浪拍如鷲。百丈徐牽。岸行若蟻。狂飆淒厲。嘯於厓谷。急溜奔激。濺及篷窗。涼秋氣候。料峭逼人。同人多擁被自暖。間亦賈勇看山。倚舷四望。層嶂踴青。列嶠躡翠。煙霞之光。頃刻百變。汀曲秋花。雜無名目。隨風斜暉。流媚送馨。中流方羊。聽其所汎。狂朋圍坐。笑語雜揉。亦足樂也。

舟過清渚源口。風定雲斂。天日晴朗。江中荇藻。疎落有致。五色亂石。璀璨紛鋪。淵漾如霞。俯視清漪。照見髮影。心波湛然。旋有漁舸兩三。舳列鸕鷀。乘水而行。生滑如溜。問有魚否。答亦不賣。時餐霞君袖手微吟。乍得佳句。共擊賞間。魚籬蟹簍。散綴澄波。忽觸舟鼻。載如君乃展攝影器。攝取風景。余亦隨肩騁望。遠見一小石塔。側聳山坡。危岸陡勒。輒作峯勢。長林隨轉。突呈村影。已復行十里。至蘆茨門矣。蘆茨門爲入隴之口。隴中兩山夾峙。湍流如箭。庫蓬

五兩。上下甚艱。故俗傳有風七里。無風七十里之謠。蘆茨門之東。爲蘆茨溪。溪有大小二源。山皆壁立。一出紫洲。一出西坑嶺。至端平橋。合流入江。入蘆茨溪五里許。爲白雲源。亦名蘆茨源。重山插天。林麓葱茂。唐隱士方干隱處也。權人謂蘆茨門多捕魚爲業。秋水澄鮮。鱸魚正美。隔江招買。小艇徐來。猝不可得。卻自恨食指不動耳。

由蘆茨門復行五里。至嚴陵山釣臺。時表已一句鐘矣。嚴陵山亦名富春山。清麗雄奇。號爲錦峯繡嶺。仰望東西二臺。聳然對峙。高百餘丈。下瞰大江。臺下石筍矗立。林篠葱鬱。洵巨觀也。卽在舟中午餐。盥漱既畢。拾級登岸。謁嚴先生祠堂。祠外碑碣林立。有二石亭。大書釣臺西臺故蹟。清康熙間。知府任風厚建立石坊。額曰千古異人。祠供嚴先生像。配以方元英。謝皋羽。范文正。歐陽文忠四栗主。右偏爲客星樓。再右爲先生後裔守祠住室。因遭秋中颶

災。椽桷傾欹。鱗瓦滲漏。甫在鳩工修葺。宋范文正守睦州時。曾建釣臺書院。厥後踵事增華。並有招隱堂。清風堂。遂高堂。問隱堂。羊裘軒。尙志齋。高風閣。雲峯煙水閣。三公不換亭。天下十九泉亭諸勝。今皆不可復問。叢木蔽虧。層基化蕪。緬其曩構。實企崇規。出祠右小角門。仰行數武。喬松矮柏。羅生崖下。中通盤磴。陡峭直上。一路青苔。攙以石氣。半山黃葉。落有風痕。枝礙帽簷。石鈎衣角。藤蘿峭壁。古綠盎然。歷陟東西二臺。俱有石亭。題刻楔額。一曰垂竿百尺。一曰留鼎一絲。兩臺之間。雲鎖山坳。亦建石亭。略可小憩。余乃倚石藉草。踞坐片時。雅枝嫩篠。娟娟拂人。俯覽臺前。萬山玉峙。一水盤迤。竹樹人煙。幽隱隔岸。祇疑百丈高臺。求同緣木。自非任子。無術投竿。或因山水滄桑。今昔異狀。勝情所寄。益仰高踪。

東臺之後。樵徑蜿蜒。直躋層嶺。上有平田百畝。旁有流泉。大旱不竭。可給灌

溉。陸游釣臺買田記。曾詳誌之。近由祠裔耕種。以爲先生歲時祭享之奉。俗因嚴陵山。屬桐廬孝泉鄉。遂呼山上祠田曰孝泉田。井曰孝泉井。誤傳山後張村。爲孝子張姓所居。實攷孝子姓夏。名孝先。晉時桐廬人。孝泉在黃山之傍。孝先父亡。負土成墳。廬其側。一夕野燒。迫及塋域。孝先繞墓號慟。羣鳥忽集。濡羽沃滅。尋於火處。湧泉一穴。味極甘芳。延流入江。溉田數百畝。縣令李師。名之曰孝子泉。號所居曰孝泉鄉。野語傳訛。應訂正焉。

西臺爲宋謝皋羽慟哭處。天涼風急。挾酒登臺。設天祥主。伏酌亭隅。因作楚歌。招魂關水。其事與辭。千古獨絕。宋嚴侶。字君友。子陵三十五世孫。嘗與皋羽共結汐社。雪夜同登西臺。慟哭。皋羽之死。並助方韶卿。吳子善等。葬之子陵臺南。而其善繼高風。不墜遠韻。直與富山桐水。流峙寰中。乃世但知皋羽涼天之哭。竟忘君友雪夜之登。余謂子陵之隱。繼志殊難。皋羽之哭。同心尤

寡。廉頑立懦。俱以風節相高。未可任其湮沒不彰也。

余登釣臺。躡革底履。風磴陰苔。滑不留足。同步下山。益懼顛仆。乃跣足鼓勇而降。但覺輕如躡霧。迅若御風。蹋壁攀蘿。影留石上。援枝俯水。身在樹間。然亦十五分鐘。始抵嚴祠。淪茗見款。箕踞清談。遇土人汪釗慶君。因問由釣臺四十五里至嚴州。若出七里隴至胥口。尙有二十里。汪君又稱。子陵有弟曰嚴晁。爲正史所未載。釣臺下五色小卵石。較之雨花臺石。晶瑩相敵。余因選拾數十枚。用佐案頭清供。旋即登舟。問十九泉。斟注一壺。炊新烹茗。其味清甘。泉在釣臺江心。陸羽與李秀卿評水。分爲二十等。以嚴陵瀨水爲第十九。復問嚴陵灘所出子陵魚。須至夏曆五六月間。漁者布網於河灣大灘兩岸。日中羣浮水面。就而捕之。形細如鍼。味勝白小。茲屆秋深。非其時矣。舟渡南岸。軟沙堆絮。亂石阻篙。遂踏白沙。躡紫石。披荆榛。登陂陀。訪尋謝冢。

突見石坊矗立。額曰宋隱士謝皋羽先生之墓。坊後碑亭。詳載墓誌。舊志墓右有許劍亭墓。左有汐社亭。其友方韶卿。因皋羽曾合同好。作許劍錄。結社會稽。名曰汐社。蓋以朋友之道。期晚而信。故建二亭。從其志也。傾廢已久。遺址烟蕪。禁樵古壟。祇此棲神。表樹荒阡。何人酌酒。荻花散雪。折幹欲墜。薜葉鋤香。繁枝侵隧。惜無好事。肝飾清風。墓右沿江西行一里許。林際螭牆。幽映雲壑。松榭交影。一徑蟲鳴。是爲嚴陵塢。漢子陵寄跡處焉。屏山突青。曲瀨拗綠。橋通蓼岸。下泛落花。溪繞柴門。時鳴古瑟。衰柳蘸水。風裊韻秋。老柏參天。雲低舞暝。春相隔竹。炊煙出崖。閒呼野老。細問村居。已無嚴姓。世服先疇。惟嚴州多子陵。玄裔耳。興盡返舟。順流迴棹。不五里許。暮煙四起。夕陽棲嶺。涼波菴天。彩翠嵐光。紛無處所。戀賞之心。尤不忍別也。

廻舟過清渚源口。天色漸暝。岸柳入夢。風生近嶼。潮音在松。煙鎖遠村。燈光

芬陀利館瓶藥

遊記

七

亂水。直至街鼓二更餘。始返桐廬惠賓旅館。卽治晚餐。對酒閒評釣臺勝概。復問桐廬名勝。侍者爲言距縣西北四十里。有鐘山。其形如鐘。晉周顒隱金陵之鍾山。出爲海鹽令。孔稚圭作文嘲之。後顒卜居於此。因亦以鐘名山。與鐘山相對。有周顒嶺。上有田園。顒隱處焉。附近有館仙洞。垂雲洞。瑤林洞。桐源洞。最爲幽勝。遊者雖有勝情。而無勝具。妙克探其靈奧焉。山徑修曲。叢桂不招。洞府幽奇。白雲自遠。未能蠟屐。便謁林巒。因附誌之。以爲他日清遊之券。

十日早餐後。仍登錢江輪船。時表八句鐘啓旋。朝日三竿。層雲耀景。澄江百里。急湍流煙。曲溆鳴輪。倏起鳧雁。危厓激浪。若挾雷霆。風送林香。塔逐檣影。時表十句半鐘。船泊富陽。聯袂登岸。暫憩旅舍。謀踐鶴山之遊。鶴山一名石頭山。在富陽縣治東百餘步。下有石磯。爲縣治關鎖。形如鶴。故名。山有觀濤

所。奇峯高聳。橫截大江。孫氏曾於山頂建道觀。故又名觀山。拾級登麓。爲靈官祠。上爲春江第一樓。舊高三層。今改爲二。內供玉皇雷神。左右列祀名宦。倚檻遐矚。水波蕩滉。葵睦諸山。襟抱環合。隱隱雲際。後有石巖。巖下石洞。深二丈許。容十餘人。幽邃可憩。洞中有池。潄泉漾淥。護以石欄。巖右磴道盤紆。再上爲觀音閣。閣東爲恆濟壇。樓閣玲瓏。林花掩映。雲階月地。靈氣不窮。小坐片時。休息腰脚。便躋絕頂。一騁遊目。山頂舊有吉祥寺。久已移建嶺下。寺址改作文昌祠。祠後爲關岳廟。祠前爲魁星閣。今爲步雲亭。西爲雙松石。東爲待月橋。過待月橋。由左蹠蹬而下。東行謁嚴先生祠。宋淳祐間。縣令李迪創修。屢燬兵燹。清末建復三楹。舊有石碑。上鐫鈞臺真蹟四字。歲久淪沒。道光間。知縣陸玉書豎碑。曰嚴子陵先生垂釣處。祠下四亭。曰耕春。曰逸雲。曰澄江。曰虛泉。曩構不存。石骨牙出。因攷子陵釣處。證之古籍。一在七里瀨。見

後漢書。一在大桐洲。見咸淳志。一在富陽縣東北九里赤亭山。皇宋郡縣志。太平寰宇記。皆曰赤松山。亦名赤亭山。嚴子陵釣於此。臨江四懸。水石璀璨。有臺基存。一在鶴山。明聶大年祠記。宋金履祥。陳延齡等題咏。皆引此。按子陵耕釣富春山中。漢時富春爲郡。嚴州桐廬。皆隸屬之。七里瀨釣臺。亦尙在富春山。子陵往來上下。垂釣當非一處。鶴山襟帶江海。應有子陵釣迹焉。祠東山腰。近建郁氏山莊。山水互幽。花木娟秀。亦多勝致。時已過午。未及往遊。遂歷富陽市衢。在怡樂園菜館便餐。館主言有登網白魚。清蒸一尾。肥勝松江之鱸。隽逾申港之鮓。恣意大嚼。亦快事也。

午餐後。同人約遊大觀樓。清康熙間。縣令錢晉錫。築南門城。並建樓於城上。名曰大觀。作賦記之。下臨大江。帆檣如織。半石浮鼉。波影搖白。一沙橫紫。草痕送青。雁帶秋聲。遠排林際。鷗迷水曲。自入煙深。四圍層巘。貢景紆暉。紫翠

之氣。起滅萬狀。時表三句鐘。迺攜行篋。赴杭富汽車公司車站。遇有行客。談及富陽城東二十里。有宋甸村。宋法師居之。爲富陽法中之巨擘焉。其法刻樟柳木爲人。可問吉凶悔吝。每授一人。須納幣三十圓。近猶盛行蘇浙間。左道小技。亦可駭也。時表四句鐘。登汽車東行。時值公司改組。車輛窳敗。道路崎嶇。鼓駛愈速。顛簸愈苦。僕僕秋駕。計程八十里。一路嶺繞溪環。綺疇交錯。翠竹白沙。村居如畫。陂陀逶迤。起青伏翠。修林夾峙。清芬掬人。輒見農場。前匯方沼。寒陰野熟。打稻聲忙。經白露後。風災蟲害。秋成歉薄。田歌不歡。晚六句鐘。行經梵村。夕陽接樹。翠靄暝浮。更經閘口。越萬松嶺回杭。已聞南屏鐘動矣。孫郁胡嚴四君。俱赴湖濱旅館餐宿。餘興未盡。更申次日西湖之約。昔者應劉七子。常調多疏。嵇阮五君。歡筵不密。擘芳紉佩。折華寄思。余與漱石餐霞。寄凡載如。結社滬濱。久契苔岑。偶踐遊期。不圖主客。閒評韻語。還和陽

春。曾讀漢書。共慕嚴陵節概。江山雙鬢。風雨一舟。驥足功名。羊裘歲月。不牛馬以徇俗。不雞鷲以辱身。元英清芬之樓。皋羽淒涼之劍。淳風並穆。亮節俱高。癡傲羣公。感興百世。客星千里。想其光塵。古月雙臺。鬱乎夢寐。名山有謁。非因風月而來。小艇可招。深領煙波之趣。眞賞林泉以外。見有淺深。相期蘭茝之芳。胸無畦町。雖慕乎古。未必合乎今。而志夫山亦愛樂夫水。是以追歡浦溆。浪跡嵐巒。賓月乘風。共迎秋色。連裾接襖。時染松光。遊霽宇以澄心。斟芳醴而寄興。藤蒲結靜。無假仙佛之緣。竹柏佇懷。自得江山之助已。

芬陀利館韻藁

紹興周大封辨西甫

問瀨集

餐霞社長約遊子陵釣臺夢坡宗臺來詩簡行適聞桐廬有警未卽解纜因步原韻

風鶴無端阻漫游江潮淺漲滯烟舟清秋好結肥鰯網何處弘之三石頭  
久披林類負薪裘去住閒雲自在流差與狂奴堪比傲西湖巖藪十年留  
黎陽詩酒結良儔相約桐江共討幽翹首客星耀繡嶺煙波七里望中收  
悠悠身世易驚秋且向山川一寫愁誰借參軍竹如意叩舷高唱隴頭流

附周夢坡先生原詩

聞說明公作壯遊青山紅樹迂輕舟嚴灘卅載前曾過絲竹管弦儼兩

芬陀利館韻藁

詩集

一

頭

江深五月尙披裘不作人間第二流白水故人空有夢此生卻被釣竿留

逆流纔識之江曲倏過富春景漸幽高閣桐廬臨水倚兩山鶴鶴眼簾收

西臺竝峙亦千秋欲哭無聲暗自愁弔古定生無限感長吟付與怒濤流

餐霞約遊釣臺改期緩至再用前韻代簡

高風共羨澤中游雨霽潮平好放舟似有相招山桂外客星燦燦正當頭  
且拌沽酒解貂裘秋水扁舟釣逆流恐被山靈笑城市狂奴也好賈胡留  
子荆公弼鳳鸞儔謂漱石巖傑東書詩境幽謂濂源要向先生分野趣奇峯

怪石筆間收

行吟取適水天秋美人不來雲壑愁眞賞須尋泉石樂待君擊楫沂江流

自萬松嶺經江干乘商輪入富陽縣境

驅車越龍窰朝露浥萬松湖雲滂嶺下迴望白濛濛逶迤達江干征袂登樓  
舸一聲汽笛鳴鼓浪破長風倏過羅刹岸不見九曜崇茨淑鷺宿鶴蘆渚駭  
賓鴻松竹飛晨翠楓栢漾秋紅迴環江千曲轉側山萬重邈若出塵境翼然  
凌清穹迎面挹秀麗憑眺仰靈峯講席昌聖學百川期朝宗世界趨新理文  
言鬼話雄道德終不墜庶幾進大同

輪舟過富陽

秋江壯波濤登艫喜霄朗倏轉風雷輪水火相激盪浩浩凌清虛泛泛遵修  
廣千里澄午景一氣森萬象雲表赤亭峯倒浸落億丈列巘環縣郭樓臺波

芬陀利館韻藁

詩集

二

蕩漾魚紋生湍棧雁語雜溜響鑑漲俯蘆蒲枕流越林莽余生昧舟楫濟川  
輕泱滂逢時無安危守道有消長因慕羊裘翁高蹈絕塵鞅祇戀富春江客  
星長來往

舟過富陽再口占

白蘆紅樹雁初賓淥水樓船試汽輪潮落千帆飛送客山排兩岸走迎人灣  
環林壑轉之曲頃刻樓臺過富春明日釣絲買十丈子陵瀨下共垂綸

登桐君山

峭壁臨江落夕曛巍然傑閣訪桐君凭欄想見軒黃世遠岫猶橫太古雲  
不須丹鼎覓瓊編不必黃精刷十年上界猶煩官府事林邱歲月勝神仙

桐廬曉詠

曉市白沈千嶂月秋城綠抱一江煙半灣紅樹藏仙觀兩岸青山過客船

桐廬放櫂

風急天涼晴不知一江綠浪櫂聲遲流雲過處生仙梵林壑清秋萬籟吹

舟經蘆茨溪口望白雲源方干故居

槩澗懷高躅人意山俱深溪轉白雲遠逕迂煙莽侵遐想元英閣清芬流古今遺構怨荒蕪崇嶺自崎崟松風灑然過呼客鳴山禽故墟合綠樹寂境誰能尋自非泉石癖豈具見道心慨慕文字香愛此釣臺吟

白雲源在釣臺東南干有詩曰吾家釣臺畔又曰林中夜半雙臺月美玉無善價高絃少知音為君效三拜羽觴飛一斟

舟入七里灘和餐霞原韻

百丈徐牽水石隈微茫初見子陵臺隔江招賣鱖魚艇斜日西風入瀨來擬向狂奴借釣竿天高風急一江寒遊魚無數綠山上祇愛雲山水底看

附郁餐霞先生原詩

芬陀利館韻藁

詩集

三

扁舟款乃碧山隈卅里瀧程到釣臺知已二三詩思遠一江秋色櫂聲來

灘頭逆水舟行緩江上西風八月寒客裏衣單擁被臥青山如在夢中看

子陵祠堂

早向人間變姓名祠堂何幸拜先生應傷國事元黃戰自結仙緣山水盟先生為梅福子塔獨敢高眠見天子儘多癡語薄公卿烟波釣艇臺前過星象江湖向客明

子陵釣臺

風急天高山鬱盤平臺秋聳暮雲寒齊男氣節三徵駕漢業經綸一釣竿魚餌何須任子慵臺高百餘丈羊裘自樂太公儲來過漁父多幽致長嘯煙波七里

灘

再詠釣臺和漱石原韻

豈爲求魚理釣絲羊裘五月亦驚奇高臺聊寄滄浪興東海投竿總寓辭

附孫漱石先生原詩

百尺何從理釣絲高臺遺跡太離奇豈因已奏安劉績傲屣動名故託辭

再詠釣臺和餐霞原韻

高風並峙東西臺子陵自樂皋羽悲碑碣荒涼遺蹟渺烟波何處問漁師

附郁餐霞先生原詩

渭北江南三釣臺淮陰末路不勝悲桐江高士磻溪叟兩箇漁翁是我師

芬陀利館蕪葉

詩集

四

再詠釣臺和寄凡原韻

漢宋清風遠秋崖訪碣來江山此慟哭千古峙西臺

附胡寄凡先生原詩

斯世誰真隱扁舟入瀨來高風久不作徒見此空臺

嚴陵塢

山陽猶傳漢姓名讀書垂釣想幽情遺風應不論魚價求益常聞買菜聲井宅幾更王謝主祠田幸有子孫耕雲深卽是桃源境何識人間百局枰

謝皋羽墓

登臺挾酒酌孤臣宰樹荒涼水石濱九死獨悲文履善一生祇學屈靈均招魂是處啼朱鳥許劍何人薦綠蘋擬獻楚歌吟未罷敲殘如意一酸辛

自清渚源夜泛抵桐廬

西崦沈夕陽四野峯圍暝冥坐泛莎渚風泉妙清聽長林煙漠漠幽眺寄遐  
興天際感秋聲雁鳴落汀澄燈火遠明滅知近城區勝歸榜入夜闌柳夢呼  
不醒

自桐廬乘輪舟抵富陽用謝靈運富春渚原韻

汽舟發桐溪遙指富春郭朝曦媚邱巒秋煙澹林薄順流鳴風輪川疇紛綺  
錯潛演渺千里百折轉雲壑形骸喜自放悟物懷遠託命輕世險巖道守水  
柔弱終期塵外游葦鱸契秋諾臨渚緬謝公傑句驚搖落矯健羨搏鵬徧劣  
慚屈蠖

遊鶴山登春江第一樓和載如原韻

躡屐秋崖景物幽危樓坐嘯壓濤流九仙壇峻香雲合山有恆萬井城深午  
靄浮松竹風敲山鬢髮鶴鵝磯泛水咽喉山下石磯形如鶴客星千里忙何事葉葉

芬陀利館韻藻

詩集

五

蒲颿散不收

附嚴載如先生原詩

春江吞吐鶴山幽憑檻開襟瞰沃流曲磴縈迴煙樹合晴樓巖峙釣磯  
浮羣峯環郭齊低首一水當門此扼喉行繞四周俯城市富陽風物眼  
簾收

嚴載如屬題三世耄耄圖

義行門庭歲月緜吳淞頤養得真詮一家梁孟稀同壽三世劉樊定列仙侍  
硯龐眉傳祖德含飴華髮喜孫賢始知美意多延慶菊液何煩酌酈泉  
釣臺訪勝溯霜菘爲誦先芬福壽兼吳帶曹衣圖六老佛心仙骨仰三嚴箕  
裘德共雙星耀海屋籌輸獨姓添我亦思參駐彩訣高尋雲景摩瑤籤

富陽大觀樓

沙鳥翩翩午靄收  
春江風物颯然秋  
綠波雙槳人趨市  
黃葉千山客倚樓  
富陽汽車道中

秋風林壑駛奇肱  
起伏陂陀翠萬層  
迎送青山分列隊  
崢嶸雲路竟蜚騰  
清溪幾曲抱村流  
野熟農家事事幽  
一片夕陽嵐翠裏  
山歌林外揭吳喉  
霜落楓林炤水丹  
平岡車站暮雲端  
婦童每聽鳴輪集  
隔隴迎人撥轆看  
野水荒墟柳影青  
汽輪轟耳走雷霆  
清秋萬籟聲難辨  
百里烟霞送客星  
車前晶森大江橫  
知隔杭州一水程  
茅店經時生酒味  
雲崖轉處落鐘聲  
重巒疊嶂水回環  
三日清遊飽看山  
莫負客中閒日月  
貪歸城市戀塵寰

舟泊鑑湖

水送山迎到鑑湖  
白蘋紅蓼狎鷗鳧  
魚龍猶記兒時棹  
蝦蟹喜隨客裏廚  
疏柳鳥聲沉遠浦  
夕陽林影散平蕪  
高秋閒步尋芳草  
處士今應有謝敷

芬陀利館瓶藥

詩集

六

登快閣

千秋快閣崢嶸在  
幾見詩豪踵放翁  
勝事雅追陶謝樂  
高吟淡愛宋元風  
晴波未月浮空白  
秋樹無花返照紅  
滿野黃雲初落雁  
喜聽打稻四鄰豐

題沈康侯大禹陵廟志

會稽禹穴跡湮荒  
聖德神功澤被長  
東導九川平貢賦  
南巡萬國會冠裳  
空遺風雨空亭石  
鎖繫蛟龍古殿梁  
千禩廟陵無志錄  
誰歌乃粒慕前王  
瀆記山經非異聞  
夏王轍跡八荒勤  
會稽本屬揚州域  
宛委何拘禹貢文  
石紐星虹疑僻謬  
橋陵劍舄訟紛紜  
迂儒漫囿蠅鼃辯  
盍攷三江古派分  
祥徵燕喋鳥田開  
子姓烝嘗鏡水隈  
九鼎河山供黍稷  
兩階干羽護雲雷  
帝鄉喜接粉榆近  
兒歲閒摹岫嶽來  
曾放鴛天詩酒舫  
會將菲飲薦清罍  
玉簡金書闕峻嶠  
志材<sub>可</sub>似放翁超貌詳  
湯尹推齊晏神辨  
參汾<sub>公</sub>遜鄭僑屬

事搜奇窮象罔選辭評韻協成韶瑤編深羨休文筆合付龍威守洞霄

渡錢唐江

浪翻越隴三秋雪濤壓吳城八月雷兩岸青山煙雨裏汽舟穩送過江來

西溪偶詠

不到西溪三十年煙波重泛米家船午風漫舞交蘆雪兩岸農歌打稻田  
隨緣遊戲得心安一卷楞嚴久不看柔櫓穿花轉曲岸水中突兀出祇洹  
蕭閒佛國淨根塵泛泛清漪簇白蘋爲訪厲杭游詠地一庵秋雪祭詞人  
自愧宮商不辨訛長吟短唱當山歌今朝拜倒詞壇下先輩風流古意多  
厲杭更有祠堂門外殘荷澹夕陽好事無人新榷桷草痕蘆影怨孤涼  
虛拋歲月坐塵氛水國清涼一席分愛惜秋光須盡醉人寰何事不浮雲

